

enim, ajunt, probabile est, ut sola insignitus Episcopali dignitate ante plures Metropolitanos subscriberet: sed levi admodum hæc sententia nititur fundamento, cum primorum Conciliorum subscriptiones planè inversæ sint, ac in iis plerumque alio ordine reperiantur nominati Episcopi, quam quo subscriberunt. Id clarè videre est in Concilio Sardicensi, cui Vincentius de Capua & Calepodius Neapolitanus 2. & 3. subscripti leguntur, licet Metropolitanus haud fuerint istis temporibus. Certius eruetur argumentum ex subscriptionibus Conciliorum Italiae, quippe quæ penè integræ, & quasi sine mendis ad nos venerunt. Quis non advertit Eulalium hujus sedis Episcopum, quartæ & quintæ Synodo Romanæ sub Symmacho (quibus solis ex Conciliis Italiae reperitur Pontifex Syracusanus) subscriptum proximè post Ravennensem Metropolitanum, & ante omnes alios Italiae Episcopos. Unde & tunc Metropolitanum fuisse non est quod dubitemus. Nec omittam quod Maximianus Syracusanus Episcopus, Vicarius sedis Apostolicæ à Gregorio Magno per Siciliam institutus fuerit, Epistola^a qua hæc leguntur: *Olim quidem frater-*

^a Epist. 12. lib. 3. Indict. 12.

nitati tuæ nostra fuerat auctoritate commissum, ut si quæ in Sicilia exciderent Ecclesiæ ceterisque venerabilibus locis, vel incongruè gererentur, nostra vice corrigeres: sed quia de quibusdam neglectis hætenus capitulis ad nos querela pervenit, rursus ad eorum correptionem fraternitatem tuam specialiter prævidimus excitandam. † Sed & dicam id muneris eundem Gregorium Ioanni Syracusano dedisse, eique in variis Epistolis præcipere, ut^b perquireret an Catanensis Ecclesiæ Diaconi campagis calceati publicè incederent: ut^c Lucillum Melitensem Episcopum deponeret, ob commissæ scelera, quæ ipse Ioannes Gregorio indicaverat: & ut^d cum Romano Siciliae Defensore inquireret, quænam ex Ecclesia sua bona Lucillus asportarat. Quæ singula, Metropolitanorum munia fuisse in procæmio diximus. Adde quod is mos primis sæculis invaluerit, ut nonnisi Metropolitanis hæc dignitas Vicarii ordinarii daretur, ut per alios singularum Dioceseon vicariatus perquirenti satis ex se patebit: cum in Gallia Arelatensis, in Hispania Hispalensis, in Anglia Dorovernensis seu Cantuariensis, & in Illyrico Thessalonicensis soli Vicarii ordinarii sanctæ sedis fuerint. Quibusdam tamen aliis per Siciliam sive Episcopis, sive etiam inferioribus Clericis vices suas Divum Gregorium commississe non diffiteor, cum has etiam Petrus Subdiaconus habuerit, sed id per aliquod solummodò tempus, aut pro certis tantum negotiis factum esse ex hoc maximè opinor, quod D. Gregorius acerrimus jurium Metropolitanorum defensor fuerit, ut superius ostendimus.

^b Gregor. Epist. 28. Indict. 1. lib. 7.
^c Idem Epist. 73. Indict. 2. l. 7.
^d Idem Epist. 1. Indict. 3. l. 8.

De Calari Sardinia Metropoli dicendum restat. Est autem Sardinia Mediterranei maris Insula ditissima frugum & jumentorum, & valde splendida, ut legitur in Notitia antiqua sub Constantio facta. De hujus priori nomine hæc scribit Pausanias: *⁹ Nomen Sardinia priscis temporibus quodnam fuerit apud incolæ, compertum non habeo: qui illuc è Græcis commercii causa adnavigarunt, Ichnusam, quod formam habeat insulae humani vestigi, appellarunt.* Unde Silius Italicus de illa loquens hæc habet:

XIV.
CALARIS METROPOLIS.

^e Pausan. in Phocicis.

^f Silius Italicus l. 12.

*Insula fluctifono circumvallata profundo
Castigatur aquis, compressaque gurgite, terras
Enormeis cohibet nudæ sub imagine plantæ.
Inde Ichnusa prius Græcis memorata colonis.*

Postea tamen Sardinia dicta est à Sarde, seu Sardo, qui, ut refert^g Isidorus, Hercule procreatus, cum magna multitudo à Libya profectus Sardiniam occupavit: & ex suo vocabulo insulae nomen dedit. Urbes habet plures, ut legitur apud^h Strabonem, quarum præcipuæ sunt Caralis & Sulchi.

^g Isid. Orig. lib. 14. cap. 6.

^h Strabo lib. 5.

F 3

Cara-

N O T Æ.

† Sed & dicam, id muneris eundem Gregorium Ioanni Syracusano dedisse. Ioannem Syracusanum Siciliae Primatem vocat expressè S. Gregorius lib. 7. Indict. 2. Epist. 61. ubi dolet aliquos Episcopos Siciliae sine Primatis sui Epistolis ad Comitatum profectos fuisse, quem & Vicarium suum fuisse ostendit.

LUCAS HOLSTENIUS.